

## **KPDNHEP umum pertambahan 19 barangan kawalan**

**Astro Awani**

**21 Mei 2020**

**Madiha Abdullah,**

PUTRAJAYA: Kementerian Perdagangan Dalam Negeri dan Hal Ehwal Pengguna (KPDNHEP) mengumumkan 19 barangan kawalan baharu yang terlibat dalam pelaksanaan Skim Harga Maksimum Musim Perayaan (SHMMP) pada musim perayaan kali ini.

Menterinya, Datuk Alexander Nanta Linggi memaklumkan pertambahan barangan-barangan tersebut adalah atas permintaan pengguna dan merupakan barangan pilihan utama semasa tempoh perayaan dan Perintah Kawalan Pergerakan Bersyarat (PKPB). Tarikh penguatkuasaan SHMMP bagi Hari Raya Aidilfitri adalah dari 20 Mei (Rabu) hingga 3 Jun, manakala bagi Pesta Kaamatan dan Hari Gawai pula akan bermula dari 28 Mei hingga 3 Jun 2020.

Barangan terbabit ialah tomato, kubis bulat import Indonesia dan China tidak termasuk kubis Beijing, lada benggala hijau, kacang panjang, sawi hijau, bendi, bawang besar China, bawang besar Holland, ubi kentang import China, cili kering dan kacang tanah.

Turut tersenarai ialah ikan kembung termasuk ikan mabung, ikan selayang dan ikan tongkol dengan berat antara 7 ekor hingga 10 ekor setiap kilogram (kg).

Barangan lain ialah ikan segar beku kembung, ikan segar beku selayang, ikan segar beku selar antara berat 8 ekor hingga 10 ekor setiap kg, dan ikan temudok dengan berat antara 3 ekor hingga 5 ekor setiap kg.

Pertambahan ini menjadikan keseluruhan 35 barangan kawalan.

"Kementerian akan terus meningkatkan pemantauan dan pemeriksaan ke atas bekalan dan harga barangan di seluruh negara.

"Pengguna juga dinasihatkan agar tidak membuat pembelian berlebihan kerana ia akan beri tekanan kepada harga barangan," kata Alexander.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/kpdnhep-umum-pertambahan-19-barangan-kawalan-243864>